

言語品第八 十有三章

言語品者。所以戒口發說談論當用道理。

惡言罵詈 僇陵蔑人 興起是行

疾怨滋生 遜言順辭 尊敬於人

棄結忍惡 疾怨自滅 夫士之生

芥在口中 所以斬身 由其惡言

諍為少利 如掩失財 從彼致諍

令意向惡

譽惡惡所譽 是二俱為惡

好以口僧鬪 是後皆無安

無道墮惡道 自增地獄苦

遠愚修忍意 念諦則無犯

從善得解脫 為惡不得解

善解者為賢 是為脫惡惱

解自抱損意 不躁言得中

義說如法說 是言柔軟甘

是以言語者 必使己無患

亦不尅眾人 是為能善言

言使投意可 亦令得歡喜

不使至惡意 出言眾悉可

至誠甘露說 如法而無過

諦如義如法 是為近道立

說如佛言者 是吉得滅度

為能作浩際 是謂言中上